

四庫全書

集部

欽定四庫全書

集部

讀書齋偶存稿卷二

詳校官庶吉士臣汪彥博

助教臣常循覆勘

總校官進士臣朱鈐

校對官中書臣潘曾起

謄錄監生臣許溶

欽定四庫全書

讀書齋偶存稿卷二

禮部尚書銜葉方藹撰

途中詠物詩

雲

巫峽高高湘水深來從何處去難尋
遠隨孤鶴一片影輕結平田十里陰
未信為霖終有日應知出岫本無心
自憐漂泊常相似目斷氤氳滿禁林

新月

娟娟細魄吐逡巡
隱漢藏雲迥莫親
卷幔乍疑鉤墮影
閒奩直認鏡生塵
預愁仄正安難定
漫訝寒纖照未勻
寄語嫦娥勞自愛
夜來斫樹是何人

細雨

飄如輕霰散如絲
灑幕侵燈獨夜時
幽伴苦吟聽更遠
恨和殘泪滴俱遲
寒門白日消都盡
京國浮雲望愈疑
曉起前林倍惆悵
百花狼藉草華滋

梅花

亭亭玉立正消魂
照眼寒英處處繁
爭忍負他春白晝
最難忘是月黃昏
折殘野岸俱無主
開遍村家盡掩門
料得有誰憐寂寞
祇應啁雀自爭喧

松

百尺森疎倚梵宮
雪欺霜壓更蔥蘢
晴搖翠粒娟娟露
雨裛蒼鱗冉冉風
漢時荒來龍馭斷
葛仙去後鶴巢空
西園桃李時相笑
占盡韶華任綺櫳

杏花

曾託孤根上苑栽
數株飄拂野塘隈
艷隨流水溶溶去
香逐輕風款款來
猶媿生成勞雨露
敢期移植近樓臺
可憐攀折供人便
辜負東皇著意開

柳

漢宮三百六妝樓
處處垂陰滿御溝
天子折來親賜佩
內人挿遍待招遊
思攀纖手絲千縷
欲鬪脩眉黛一鉤
今日相逢江岸上
藏鴉繫馬不勝愁

枯樹

無復凌霄聳壑心
千尋落落卧幽岑
敢將榮悴爭時代
獨與巖流共古今
縱使汎來難近漢
便教斲就不堪琴
南朝名士雖工賦
未解莊休意更深

青草

春風吹遍卻還生
一片青青染不成
南浦別來猶髣髴
西堂夢去最分明
待施舞席層層滿
忍碾香車處處平
露壓烟迷多少恨
幾人為爾倍傷情

燕

飄零此去欲何依
滿目東風計總非
翠幙香消春窅窅
畫梁月斷影微微
釵頭曾憶雙棲穩
掌上誰憐獨舞稀
知有舊巢無路入
馬前惆悵亂紅飛

鶯

何年却下建章枝
駐馬斜陽獨聽時
漫有奇姿臨野水
空傳巧語出村籬
五更百舌休相妒
一樹繁花祇自悲
好謝嚶鳴舊時伴
春風那憶有佳期

鷺

曾隨春水汎輕潮
浴罷橫塘第幾橋
汀草汀烟愁漠漠
江南江北恨迢迢
青天飛處雲離岫
碧樹樓來雪綴條
京雒風塵今正滿
可能不上素衣飄

烏

羣飛羣起夕陽西
啞啞天邊接翅齊
秦女機頭愁未歇
蜀姬絃裏怨初低
風號黑夜憑巫語
月冷黃沙雜鬼啼
莫笑紛紛惡毛羽
鳳城多半是君栖

蜂

小苑華池路未遙，
衆香深處坐朝朝。
六宮美女爭塗額，
一國佳人盡細腰。
晴逐柳花飛掩冉，
暖隨蜨翅去飄颻。
卻驚樹底紛紛散，
憶得當時早晚朝。

廢宅

墮碧顏朱委道邊，
獸鐸魚鈴倍淒然。
更無上客迴珠履，
時有行人拾翠鈿。
風蕩帷空螢自入，
雨淋檐斷燕還遷。
阿誰計得當年事，
可許輕臨畫閣前。

叢祠

冕服巍我列像崇也應一國有三公邨知此日生民病
慣竊從來造化功篝火妖狐鳴半夜啄腥怪鳥噪西風
堪憐野老紛陳乞猶自殷勤望歲豐

琴

鍾期已逝蔡邕亡太息朱絃尚在房玉軫金徽誰愛惜
高山流水自淒涼蛛絲斷處星爭露燂斧停時語忽長
伐盡梧桐千萬樹不教重種嶧陽旁

殘燄

殘燄微微背壁幽
銅壺滴盡轉添愁
可堪夜雨黃茆驛
最憶春風紫桂樓
顧我已甘灰並冷
問君何恨淚長流
多情此夕分明處
不照華筵照白頭

清明日河間道上

客裏對春春可憐
況逢佳節更潸然
一枝兩枝還垂柳
十家五家常禁烟
夢草不青惟北地
望雲多白是南天
依稀憶似故鄉處
水鳥雙飛綠滿川

偶成

廝養誰家婦徒行陌上塵都言趙宮裏原是舊才人

入都門

三條九陌望中清又睹青雲接鳳城身逐梗萍和浪轉
心同葵藿向陽傾從教隱士嘲西笑漫託騷人賦北征
便隔風波千萬里人間何路覓蓬瀛

上王子雍先生

三年函丈沐清光玉筍叨陪最末行自笑門生新印綬

却慙夫子舊宮牆
鶯啼渾欲迷芳樹
燕語猶能記畫梁
惟有叩恩知不忘
寸心應共海波長

題畫戲示同館友人

舞風歌月舊時嬌
寂寞胭脂半欲消
好語楚王宮裏伴
披圖莫更妬纖腰

簾

畫樓西畔曲堂東
銀蒜低垂面面同
影疊千層花掩冉
光搖一片霧朦朧
沉沉伴夢宵難醒
漠漠遮春路不通

愁煞綠窗鸞髮女幾時容易出房櫳

七月一日大雨書署壁

七月一日南風急倒卷海水水飛立天吳紛趨海若走
怒濤惡浪旬相射野夫夢裏枕席驚忽疑萬馬中原奔
又似刀摩與劒突鎗鎗銅鐵烟塵昏披衣眎天天容墨
扶桑金鷄叫不得但見玉女投壺失笑屢開眼東方阿
香掉車扇霹靂須臾牀榻成深淵龍宮鬼國在眼前拔
劍裂背忽大叫失勢恐落饒蛟涎誰為縱此雨工惡我

欲乘雲訴寥廓虎豹森森爭攫人九關不肯輕開鑰上
帝尊嚴絳闕屈白玉為閣黃金除瑤池傳觴百靈醉那
知下土民為魚罟風吹我墮塵陌猶聞哀聲滿藪澤裂
裳擁被塞耳卧凍蠶縮繭鳥塌翼君不見長安袞袞多
公卿衝泥躍馬氣橫參朝來泚筆緣何事惟頌商家傳
說霖

中秋對月有感

不遣微雲滓依然此太清無私應解照有象盡能呈影

浴金河淨光含玉露盈流螢何意緒猶向隙窓明

冢宰貞菴公相見次諄諄以進退人才為言兼念
及家兄情意真摯小詩二首奉獻情見乎詞

廿年清望冠諸公新領銓衡職更崇玉尺自量羣品上
冰壺獨湛萬人中披開雲霧青天皎搜盡珠璣碧海空
知道報

君惟薦士只今吐握有誰同

早同獻賦識相如晚向高門濫曳裾

家兄與公同領壬午鄉薦戊戌殿對

出公門下北望可憐迷雁翼東歸寧為憶鱸魚已欽季布千

金諾肯惜劉弘一紙書願借春風速調律有人寒谷待
吹噓

忽忽

忽忽秋都盡蕭蕭晝屢陰交因貧易淡門為閉長深新
雪催雙鬢寒灰証此心南飛何處雁愁絕故鄉音

都門春望

東風吹雨復吹烟悵望新年憶舊年拂面遊絲爭匝地

遮人芳草更粘天情多肯學捎花蜨愁極難聽叫樹鵲
七尺綠波三尺艇與誰相約碧雲邊

題二畫扇呈知己

灼灼朱霞射曉空花開花落片時中爭知海上蟠桃樹
直到千年一度紅

朱槿花

珍果曾登寢廟來孤芳今見伴蒿萊無人攀折無人賞

贏得春風自在開

櫻桃花

送左虔孫學士歸里

公竟拂衣去翩然辭帝關須令千載下猶見一人還鴻鵠清霄遠龍蛇大澤閒翻嫌謝安石捉鼻向東山

庭鷓

池畔摧頽花下鳴雪衣丹頂不勝情思鄉遠隔華亭水憶別長牽緱嶺笙雲路斷寧生悵望鷄羣立最憎分明終年一飽知難得敢想乘軒道上行

董侍御教伎人花下度曲自與諸賓飲酒別院即席戲贈三首

紅墻隱隱接天河
皓齒花前自按歌
最喜春風關不住
梁塵偏落座中多

嬌喉宛似擊珊瑚
一曲新聲一串珠
縱有周郎猜誤處
橫波頻送得知無

千卮引滿不成歡
祇為名花一見難
我有狂言驚四座
與君單借紫雲看

書董侍御齋壁

長安惟此徑
日日綠苔生
地僻塵難到
窗幽夢易成
汲

泉防竹洗分食待禽鳴笑對花開落知君不繫情

擁鼻

擁鼻塞裳上馬時此身何處許相宜百千隊裏懷常怯
十二衢中步獨遲未免形容溪鳥笑可憐心事落花知
鱸魚正美蓴絲脆莫到秋風更後期

歲暮作四首

卧聽鐘動杵撞胸噩夢驚迴欹枕中可有車堪投鼠穴
忽疑身暫寄鵝籠縱橫窮鬼憑文送層疊愁城仗酒攻

笑指黃梁炊熟未榮枯歷盡本來同

飢鷹脫臂向風呼廿載消磨舊壯圖入夜星昏恒拭劍
臨秋月滿數彎弧狂思海上醫龍病危欲山頭捋虎鬚
準擬雄飛九萬里可憐原只在槍榆

滑滑泥聲塞路岐深居端莫歎淒其觀河鰓面寧如我
窺井懸腰更讓誰便聽釣天惟解睡縱遊蓬島亦嫌罷
簞瓢門巷無多地果否前賢樂在斯

欲憑簡冊且婆娑祇覺開編恨轉多但說艱虞三太息

偶逢得意一高歌
椒花栢葉羞陳頌
土梗桃符任刺訶
蓑笠江湖無恙在
期君不至奈君何

連日不見健菴編修今晨苦熱特甚走筆奉訊

吾居帝城南君居帝城北
閉戶十日散髮卧瘦馬不識
東西陌美人娟娟隔清漢
孤身欲傍無羽翼思君作官
未三載歛忽聲華滿京國上殿

至尊屢含笑入坐公卿皆動色
嗟予潦倒恒愁飢伏處
真如禪中蝨牀頭老甕傾漸乾
月俸不充沽酒直丈夫

但免巾幘誚此生敢辭藜苒食朝來束帶出門望火雲
升似峰崒崒義和揮鞭更翕霍夸父暍死鄧林側發狂
大叫苦不止咫尺一見何由得那憑爾輩為霖手盡挽
天河洗結轡坐看雷雨濯亨塗道上清風生兩腋野夫
翛然卷懷退鼓腹康衢歌帝力

戲題西樵考功長齋繡佛圖三首

如水臣門日下簾知君心性愛幽探退朝啓事方才了
便與彌陀共一龕

妓房匣鏡終嫌癖
酒庫封瓶亦太迷
寄語街南王吏部
不妨何肉更周妻

跌居可便了塵牽
長日清齋結淨緣
爭免謝家靈運笑
他時端只好生天

史館馬君麟徵故秦督子偶過其居感而有作

宣武門東半畝宮
居人猶說舊從龍
金貂拜命啣恩數
玉帳開牙出鎮重
去病未為居第計
叔敖應待寢丘封
傳家清白看君在
勛業相期繼昔蹤

簡熊學士

百丈狂瀾手障餘一人嶽嶽衆誰如趨朝旒冕同嚴友
下直門庭似隱居憂國終朝時減食致君半部只探書
太平啓沃須相待肯使閒人屬望虛

阮亭以抱琴洗桐小像索題久未及報於其奉
命試蜀口占二絕調之

王郎日抱文章坐底有閒情似此時早向虞廷傳一曲
薰風拂拂五條絲

蜀桐聞道產高岡君去應看百丈長休令兩川人士笑
賞音只說蔡中郎

阮亭以駿孫南旺集示予因題一絕其上

春風上苑闢名花處處遊人攬物華可惜一枝瓊蕊好
不教移植到天家

送歐陽寶坻罷官還江右

故人別來十年久乞得一城大如斗姓字不博公卿憐
惠愛長在蒼赤口一朝忤時不得意解組復向風塵走

笑指廬舍長江西卜鄰
幸有柴桑叟拂衣行歌歸去來
但問松菊猶存不予亦江湖潦倒人
強襲冠裳羞老醜
便儼相從汗漫游高挂雲颿上廬阜
他時杖策一訪君
先數門前五株柳

送李編修晉卿歸閩

風雨聽雞鳴離愁黯忽生
還持古人意今日送君行
綵服高堂志孤裝薄宦情
歸山如有信好報著書成

里人蔡翁年七十矣除黔中一幕職止其行不可

詩以送之

手撚霜髭萬里行
宦情濃似酒初醒
知君過嶺遙回望
忽見台星笑口生

歲暮病中效元白放言五首

急景奔騰去似梭
鏡中華髮奈他何
西尋弱水無舟楫
東望龜山乏斧柯
銜食鳥應悲力少
號寒蟲自覺聲多
幾時借得騶生管
窮谷吹來遍太和

九陌千輪聞萬鞍
誰人不願老長安
生貪周顓黃金印

死盼王喬白玉棺舉扇遮塵寧得了抱薪止火果然難
滔滔東下元無底幾見天潢倒卻乾

病非魘魅復非狂筮得爻詞勿藥良未遣三尸行出戶
難驅二豎已離育夢中帝所聞天樂海上仙人乞異方
說與時流渾不信靈臺贏得自清涼

魚遊荇藻戀沙汀鶴破樊籠入窅冥各有升沉依本性
苦將桎梏喪真形魯邦展季甘三黜楚國靈均愛獨醒
蕙死蘭枯元不惜只教留得是芳馨

早知天地是蘧廬，去住奚分久暫殊。
有肘儘堪生柳樹，此身行便作桃符。
劫殘尚問灰存否，柯爛休驚局換無。
一擲得臬君莫笑，爭禁明日不成盧。

濟寧太白樓

一醉偶然事茲樓，萬古傳吾來弔遺跡。
雲木正參天攬鳳下，千仞騎鯨吸百川。
滔滔檻外水猶比濁醪賢。

杏花

脉脉豈無怨，亭亭如有言。
開時猶恨少，落處不為繁。
山

鳥曉還鬧鄰蜂晚更喧未甘顛顚意恐負艷陽恩

題角灣僧院

但有雲來去巖扉晝不開鳥啼林屋樹人數浙江山
影交諸浦鐘聲靜一灣誰能便捐累髮遣片時閒

秋夜

一夜秋風徧草堂空堦涼月迥如霜水禽噪客喧蘭渚
山鬼窺人傍荔牆漫興詩成閒處詠絕交書在篋中藏
欄衡天折嵇康死始信時危不易狂

南池

東屯西瀼跡全荒何處先生舊草堂
賸有南池風景在殘蟬依舊噪斜陽

龍梭

龍梭夜靜綠窓中十載行雲夢未通
秦女有情終化日楚臣無淚不成楓
三春病怯廉纖雨一夜魂移蕩漾風
無限寂寥收拾盡斜陽深樹是江東

上高陽公

紫霄烟靄晝沉沉獨掌鴻鈞副

帝心萬卉齊搖松自勁衆流皆涸海常深豈貪黃閣形
須畫要與蒼生早作霖一物祇今無失所肯教爨下有
遺音

旅步見馬上新薦諸君

連錢驕馬蹴芳埃槐影紛紛動地迴記得阿婆年少日
也曾塗抹向人來

辰山謫仙樓戲示主人

謫仙人死一千年魚去何勞更問筌今日相逢君不識
祇應未覩錦袍鮮

東山一草亭

東山一草亭雨屐偶來經烟迳封猶濕苔痕洗更青欲
窺泉的的羞照鬢星星挺鼻何人事蒼生夢已醒

題小鏡湖呈勿菴

季真七十玷朝班始乞君王水一灣何似先生方綠髮
比他早占廿年閒

飲勿菴二十四峯閣

二十四峯新與君
克下陳開牕雲入座
卷幔月窺人小
駐尋花屐頻攜
漉酒巾醉醒俱不
忘始見兩情真

辰山下贈陸蘭陔少叅陸嘗備兵兩粵

解組還家鬢未絲
遂初早見賦新辭
試看翠竹碧梧下
何似紅蕉丹荔時
廉石載歸猶壓砌
名花携種已交枝
君家二陸長遺恨
今日文孫更是誰

飲蘭陔水閣

愛君水閣好不異在濠梁禽噪知林濶魚潛喜沼長榜
人歌歎乃孺子濯滄浪滿酌無勞勸誰憐醒更狂

橫山訪一公云化去數月矣

端如一彈指俄成來去今影堂遺挂在竹几暗塵侵一
榻維摩病三生圓澤吟重來忽揮涕轉媿世緣深

九日三高士墓下作

天馬
山麓

欲登最高處應知不在山來尋逸士冢恍覩昔人顏俯
仰世俱遠徘徊心自閒卻憐辨亡客入雒幾時還

山下
即平

原村二
陸所居

弔鐵崖先生墓

先生不可見遺冢自斜暉無復攜紅袖還聞葬白衣才
消明主忌老章故人依鐵遂穿雲起猶疑踏月歸

勿菴贈方竹杖為別

素質琅琅玉比堅幽人持贈更堪憐他年倘與君重見
不敢隨時妄削員

寄勿菴子

昨夕何夕一尊共對楓林月
今夕何夕孤舟獨宿蘆花
雪半夜相思不相見搔首踟躕斷腸絕人道君家氣太
豪灌夫醉罵四坐逃我道君家無俗態魏公娥媚真可
愛丈夫重結契託附同金蘭憐君一片心盡君十日歡
西風吹何急送我出雲端抗手便辭人去珊瑚幾時
拂釣竿篴篴雙鯉魚凌晨撇波至烹魚得素書訊我遊
蹤向何處南北東西路不平莫教哭殺阮步兵但令厨
中多美酒休論世上有浮名嗟予比君狂自許吞八九

君才尚不容矧我老且醜李白當年皆欲殺相憐只有
賀家叟終當拂衣從爾峰之陽采芝食柏同徜徉寧能
低眉折腰學年少更向魑魅爭宵光

客有引韋弘微賦嘲予好奕者戲舉謝安石事荅
之

淝水千羣鐵騎塵謝公方罫鎮隨身無因說與韋郎道
三百枯碁敵萬人

寄素存編修二首

苦憶張公子年年侍玉墀
西清朝上直東觀夜紬書
心豈形骸隔交因老病踈
殷勤門外水好為寄雙魚

幾載振蘆卧身如片羽輕
豈真羞薄祿直恐厭浮名
舊好違京雒餘年仗友生
題詩報知己相望迴含情

虎丘晚步

芒屨獨往與誰期且為秋山憩
少時隔浦飛颿偏見疾
出林殘磬更聞遲輕拋狂淚真
孃墓間詠幽懷短簿祠
欲訊行藏向何處尋枝倦鳥已先知

家兄書來言劉吏部公戡將入吳聞其在梁溪急
具舟訪之已發三日矣詩以寄之

劉侯昨辭金閨籍解鞍偶憩泰山側意氣翻嫌嶽勢低
襟懷直覺河流窄山東小吏迎道邊腰支磬折學周旋
羸驂避路不知處敝裘受風真可憐劉侯一見稱同調
下馬呼酒共傾倒出手寧辭拯沉溺開言便欲噓枯槁
蹉跎五十笑無成一官惟愁白髮生尋常慰藉猶足善
矧乃出自名公卿早秋書附南飛雁劉侯挂帆下吳甸

丁寧弱弟掃蓬門八月九月應相見
梁溪蒼蒼烟水寒
美人踪跡隔雲端我來侯去若巧避
人生良會嗟何難
大兒北海人中杰小兒四世三公烈
聞侯屈指天下士
不才名姓常勞說澤鹿山麋野姓存
慚余久已謝籠樊
嵇康懶廢殊無狀辜負中朝山巨源

送人

歲暮復為別川涂雨雪繁悠悠驅馬去
脈脈向誰論
季路只一諾侯嬴惟片言知君重風義
不肯掃他門

吳門過汪大與別八年矣

並馬京華對夕曛
退朝猶記共論文
同時畹畹應憐我
今日英雄只數君
書著名山徒自解
琴彈流水定誰聞
門前千尺沄沄綠
可許閒鷗占一羣

同友人對落花

昨日春風吹花開
今日春風吹花落
流鶯睨睨燕呢喃
嘲笑春風太輕薄
東家美人惜芳菲
雙拋紅淚濕羅衣
但願似花開即落
猶勝年年怨空幕

漢武外紀

通宵甲帳暗香開
驚雀聲聲玉殿來
一個歲星猶不識
可憐虛築集仙臺

清明曲

細雨斜風作寒食
柳條拖地春無力
飢鴉來往傍人飛
紙錢銜挂棠梨白
香車轡轡殷若雷
羅裳一色空中開
哭聲未絕笑聲雜
花前不醉寧空回
摘蕊攀條情未已
落日遙聽莫鐘起
情知花事未闌珊
但望來朝風日美

吾願北邙莫種柏與松只種萬樹爛熳花開紅花紅兒
孫應到此泉下年年鬼不餒

伏枕

伏枕三竿日巡檐半畝居愁同填海鳥恨比過河魚往
事羞重憶浮名忍更除茂陵松柏老誰問病相如

題吳氏女子畫扇牡丹

妖紅一抹闌新粧國色依然壓衆芳恨少千重錦步障
為渠遮斷蜨蜂狂

江上酬諸勿菴進士

只此江城裏誰知良覲難何時一尊滿同對九峰寒花
落怨春寂鳥啼驚夢闌把君佳句在珍重比琅玕

江上漫興

塵土支離已一翁更披華髮向江東壯心不盡登臨後
倦眼時開醉醒中走馬單身愁暮雨呼鷹雙臂健秋風
終然丘壑還須我何處溪流無釣筒

歐公作醉翁記時
年才四十餘子是

年亦四
十矣

雨歇

雨歇新涼滿夕柯
小樓五月麥風和
乍披幌處三花色
欲上堦來十字波
綠綺聽時佳緒少
烏絲寫出怨情多
不知何事縈懷抱
日日人前喚奈何

睡起

樓頭春盡怯朝寒
睡起惺忪小帶寬
志士淒涼閒處老
名花憔悴雨中看
殘書竟日便搢枕
短蘆誰家正倚闌
收拾吟牋與酒醖
此生真信遣愁難

送人渡江

江草江花夾岼生扁舟三月過蕪城
勸君彩筆休輕弄
此賦參軍久擅名

寄鄔陵梁侍御

不見旬時悔吝萌
那堪經歲隔良朋
每從吳苑懷梁苑
常恨鄔陵遠秣陵
誰道青袍真御史
早疑白足是禪僧
枚生八月濤聲在
乘興扁舟待一登

侯將軍歌贈京口侯都閫

侯將軍爾何人上馬能擊賊下馬作露布眼中齟齬誰
比數隨陸之文絳灌武昨朝揖客登中堂輕裘緩帶多
輝光擘窠大書三百字字字觸目成琳琅忽聞江上烽
烟起鯨鯢跋浪東溟水將軍紫髯蝟毛豎出門仰天顏
色喜携歸髑髏血模糊當筵擲向紅氍毹要博上客一
歡笑區區侯印非所須予乃夷門抱關者感君虛左停
駟馬割鮮酌醴何殷勤說劍論兵更瀟灑酒酣兩眼纈
為我歌北風左手操不律右手鳴雕弓筆奔萬龍蛇箭

落雙飛鴻書生氣盡顏索莫將軍神志逾豪雄金山峨
峨數千尺江心玉柱排空立請磨懸崖一片石將軍親
自銘功績

為人寄荊州守

荊南風物美如何三十專城擁傳過應怪賦如鸚武少
空傳士比鯽魚多吳山東望峨峨影蜀水西來浩浩波
恐有依劉王粲在登樓莫令怨蹉跎

月下偶成

雪消雲卷欲深更
獸傍危闌萬感生
酒力共春隨日減
詩懷和月著人清
未妨窺沼潛魚躍
更擬攀條宿鳥驚
多媿烟霞競招引
有誰肯與野人爭

新鶯

簇簇毛衣柘色新
穿花度柳見還頻
憐君不借春風力
那得嬌音動主人

東友人

窮通分定莫須驚
怨曲勞歌漫引聲
榻下應憐徐孺子

金匱方集卷二
刺殘誰識補先生自傾濁酒澆花落獸卷疎簾對月明
休怪芳時倚惆悵古來多恨是多情

西牕

殘烟漠漠雨絲絲浙瀝西牕夢醒時遮斷碧山橫檻牖
催成青蘚上堦墀暫憑縱展聊舒眼休擬裁詩更皺眉
多少春光到桃李蓬蒿三徑不曾知

李氏別業看梅

鏤冰琢玉一叢叢風格天成自不同肯向粧臺迷艷質

好依巖壑伴衰翁
寒生冉冉流香外
春在亭亭送影中
莫遣高樓便吹笛
清宵幽怨恐難窮

隱公歸述五臺之勝

臺山真勝蹟
路出萬雲層
白日常防虎
炎天見鑿冰
洗心千澗水
扶老一枝藤
便合誅茆住
愁師亦未能

題吳處士莊

二月春泥一尺深
杏花門巷費招尋
爭傳市上搖頭過
忽見牕間擁鼻吟
砌迸筍皆成碧玉
囊餘藥盡化黃金

玄纁尚擬何時到只著麻衣弄渚禽

檐外

檐外陰雲幕遠天花開花謝損芳年春風那似春愁急
曉露長和曉淚懸孔氏罇中空綠酒陶家琴上少朱絃
淒涼四壁真堪笑羞見爭飛下食鳶

雒陽花

碎剪明霞作錦堆殷紅如火照堦苔天津橋上啼鵲血
一夜春風染徧開

與周生

舶客尋芳渡海遲
千重鐵網罨塵絲
夜來忽詫前洲火
新見珊瑚長一枝

浮雲

浮雲流水總無根
魚自深潛鳥自騫
莊叟已忘櫟是社
晉人忽怪石能言
蛇遊杯底寧知祟
蟻鬪牀頭那覺喧
敢道真心免猜競
一生贏得是昏昏

瓊樹

瓊樹何曾見一枝紛靡衆草競英蕤
儼從騷客求蘭佩欲向霽妃問桂旗
天上只疑星是石人間枉泣墨非絲
偶經抵鵲山前過終古無端替玉悲

瑾戶

瑾戶惟宜睡開尊祇合醺劇秦空有論
詛楚豈無文蒼狗朝朝變青蠅處處聞
那能便長往欲與鹿麋羣

贈梁大將軍

長城萬里屹吳天威著東南已十年
櫪下駒吟鬃八尺

帳前士怒劍三千親裁朱鷺鏡歌細自按黃龍水陣全
日晚戟門聞更啓時容揖客醉登筵

陳徵君墓下作二首

巖棲谷飲一生中瞬息高名付太空今日歲星應尚在
憑誰寄問大王公

堦上苔痕雨更青無人載酒過玄亭五株松頂千年鶴
留得先生舊日形

橫雲山房八絕句

雲木毵毵鎖夕嵐喜來丈室暫停驂從教塵世難容我

尚有彌陀借半龕

方丈

蔓草寒烟覆石臺雍門琴罷不須哀遊人未悟興衰理

猶對山僧問劫灰

麗秋堂舊址

二客相從步屨晴雪堂重到古今情分明赤壁孤舟夜

尚少橫江鶴一聲

雪堂

冥坐觀心萬象幽迴看六合盡蜉蝣還憐騶衍談天陋

海外寧惟一九州

高視亭

一枕松風夢不凡白雲來往戀巉巖前身便是陶弘景

官署蓬萊最後銜

只怡堂

綠玉森森倚碧雲千竿風裊翠成紋子猷去後知音少

今日誰堪對此君

葉菴

古澗無聲波寂寥轆轤千尺影迢迢仙靈那許几蹤到

一月親來一換橋

石梁

攜詩搔首問青天太白當年興只顛若遣謝宣城果在

與他吟徧夕陽川

可詩亭

天馬山歌

君不見天上房星墮地化為石山頭隱露蛟龍脊搖烟
踏霧空中橫萬馬驚視俱辟易疑是流沙西來東渡海
千里騰驤暫一息渴不飲天池水饑不仰圉官食年年
僵卧蒼苔滿蝕盡連錢好顏色問汝何為不躍還不鳴
空有神駿人莫識寧甘將身膏原野恥向庸奴受箠策
知音欲覓自古少九方已逝難復得吾聞天閑十二闌
春風苜蓿花開殘侏儒飽死朔飢死淒涼遺恨同悲歎

黃金日日買馬骨吁嗟茲馬無人看

京口遇馬章民狀元歸櫬

六年彩筆冠詞林一夜文星地下沉不見相如歸駟馬
徒聞子敬返遺琴素帷寂寞名空在丹旆飄揚恨轉深
從此九苞誰貢瑞竹枯桐死更難尋

贈豪客

青驪八尺身過市不驚塵燕尾雕弧勁龍文匕首新纔
辭磨鏡客便揖賣漿人冠蓋堦前滿寧知意所親

江上兵

羅似繁星布似綦
太平閒殺射雕兒
柳間挂甲花間卧
錯認征旗作酒旗

江邊見白鳥

吳波楚浪兩茫茫
獨占荒原立夕陽
海鶴肯教成伴侶
野鷗翻自笑行藏
誰憐皓白衣如雪
祇恨飄蕭頂似霜
難遣江湖幽興在
汀蘭岸芷夢魂長

石城謠

石頭城下清霜路黃蒿如林漲烟霧此地行人來往稀
寒鴟晝嘯枯桑樹鬼炬千羣大似輪金銀宮闕化為塵
冤魂夜半相逢哭聽得聲聲怨皖人

友人命詠團扇值其新下第

月宮素女獨乘鸞拋擲秋風怨歲寒但保今朝顏色在
明年依舊掌中看

青溪廟

青溪白石渺相望獨處終年不嫁郎曾笑素娥蟾作窟

更羞織女鵲成梁
龍旂影冑蕭蕭月
鴛瓦寒消寂寂霜
廿載無媒路旁客
還來下馬奠椒漿

月

每向愁邊見多於客裏親
雲疑淹逸彩露欲洗幽塵
一澹能娛我三更轉近人
偶窺微缺處清淚忽沾巾

周元亮少叅過訪兼示新詩畫卷率爾奉答

經旬淹卧廢逢迎
小隊花間鳥雀驚
僻徑行遲緣草暗
破扉開澁為苔生
句吟金石神尤王
卷對雲山眼忽明

敢倚嵇康真病懶不裁書札報公卿

將去白下留題寓壁

旅遊日日閉雙扉祇怪浮蹤與世違絕磴斷嵒行處路
岑牟單絞著時衣無心偶逐雲同出避色還隨鳥共飛
底事風光留不住江鄉久誤釣魚磯

秋日過鄰院

山雲禪榻靜相因偶為孤遊得笑頻閒對景光真逝水
暗悲身世總流塵頻來檐鳥疑新主別去庭花是故人

一闋漁歌數聲遂溪邊林下轉情親

采石對月歌

長江蕩蕩清無烟誰提明月空中懸寒輝流波兩相漾
照見萬里秋無邊頗憶昔時錦袍客仰邀皓魄金尊前
掬水捉月月不得騎鯨奔入千重泉月裏霜娥舉幃笑
狂奴故態猶依然不聞天上蟾兔窟乃落水底蛟龍淵
前人已往後人在依舊江流月不改恨無往日君奇句
能使江月添光彩夜深江清月轉明冷冷環珮天風鳴

彷彿精靈來共語長呼不應還心驚願乞陽侯一掬水
為君結祠幽崕裏歲歲秋光三五前高歌先生問月篇
熊青嶽學士建言部議處分奉

旨特免詩以志喜

上聖能容直孤忠肯惜身盡傳颺鳳彩不信觸龍鱗道
合轉圜美功同補袞新將無

明主意普欲勸廷臣

大笑

大笑狂歌剩一身任他滄海自揚塵
楊朱哭泣緣悲路孔聖淒涼為問津
篋裏空文祇逐鬼袖中禿刺不投人
誰知磊落襟還在目送飛鴻萬里親

欲決

欲決升沉未有因相逢誰信自由身
三更樓上劉琨月十丈門前庾亮塵
偶探藥名知小草忽看車脚悟勞薪
家山如畫難安卧枉自彌年羨隱淪

聞雁

知爾何時到哀聲苦動人
稻梁應畏少矰繳卻愁頻
榆塞歸期遠湘川去路新
可堪羈緒亂日暮更酸辛

酬邱生

不見邱遲久新詩更斐然
娥眉誰解妬牛角自相憐
吟苦防鬚禿書多怕腕穿
好携謝家句還去問高天

邀笛步

落梅折柳調紛披
獨客中宵聽自悲
欲向塵中還物色
不知若個是桓伊

吳門席罷作

醉聽韓娥一闋歌
秋雲不動碧嵯峨
蘭橈筵散悲斜日
桂館人歸逐逝波
伍相祠前潮響急
梁鴻宅畔杵聲多
由來信是傷心地
綠鬢從教片刻皤

鸚鵡武

聰明何意墮籠樊
碧樹丹山寄夢魂
莫怪花前渾不語
祇應羞作世人言

宿翁氏山樓

澄波萬疊竹千竿
延眺層樓景色寬
過雨山疑經沐見
穿雲月似隔帷看
渚蓮暗墮紅衣冷
水鳥驚翻翠影寒
心事欲拋拋未得
無言倚遍短長闌

荷花

千二百驚鴻翩然小
隊同采珠洛浦上
弄珮漢江東顰
處矜眉翠啼時怨
臉紅
一生心事在辛苦
綠房中

耦耕堂居人談近事

一枝翠柳碧苔封
天遣多情不負儂
堦下蘼蕪成勁草

庭前桃李傲貞松
蜂疑殘黛含愁亂
月作羞娥鑠恨重
金谷風光尚如舊
墜樓心事更從容

夏日憶吳中城西宅二十二韵

憶得幽棲處
城西景物增
數椽依水石
三伏失炎蒸
白板扉雙閉
烏皮几獨凭
閒常芟竹徑
悶即理魚罾
桐露清晨重
荷香靜夜凝
披襟能洒落
散髮任鬢髥
葵扇團於月
桃笙滑似冰
厨供拗項瓠
溪薦折腰菱
自檢書千卷
堪消酒百升
紅妝花當妓
白拂客多僧
覓句行時遍

園基喚不磨小兒學跳虎稚女解驅蠅買鶴添新料分
蜂換舊稱松知蹲踞慣雲讓卷舒能何屑昆為侶梁鴻
婦是朋可應齊北郭寧復羨東陵倏忽離三載艱難出
百層拊髀羞寂寂抱膝恨騰騰火宅誰能拔烟霄擬忽
昇行藏溪鳥笑顏貌野漁憎望遠心徒切懷愁病莫勝
今朝談往事惟有泪如澠

老將詞送近夫罷省試

漢家飛將老邊州射虎山南恨未休雪髯霜鬣零落盡

卻看奴隸取封侯

蘓臺新竹枝詞六首

昔老鐵製西河竹枝詞東南士女和者數百人
至今以為美談予屏居多暇感吳中近事作蘓
臺新竹枝詞六首辭雖不工語皆撫實世有君
子屬而和之他日採風者或有取焉

江南燕子日銜泥江北燕子雙雙棲銜泥底用太辛苦
雙棲只恨畫梁低

山塘十里杏花風
不見飛沙撲面紅
笑指山邊斜露處
初三月子似彎弓

小小吳娃細馬馱
春衫簇簇剪輕羅
自從幕府曾教入
不唱江南白苧歌

海門深鎖浪頭迴
不放黃魚入市來
曉起腥風滿城郭
侯家今日綺筵開

桃花塢裏千章木
拙政園中萬朶花
紫蜨黃蜂來往慣
肯分春色到鄰家

十丈平湖一尺潮紅闌亭子綠楊橋儂家自有東青鳥
不許鴛鴦近畫橈

撰西樵考功誌文畢寄阮亭戶部

恍惚相隨把袂時幽明難間兩心期敢云下筆不加點
最喜臨文無媿辭比似東蜀應恨薄即同挂劍已嫌遲
予諾阮亭請
踰歲始報友生投契猶如此况爾連根荆樹枝

徐生入都即去詩以送之

憐君衫袖滿埃塵往日風流剩角巾開口幾曾投俗好

苦吟端不救身貧還因郭樂思奇士自失荆高少酒人
匹馬擔簦又南去蕭蕭落木滿關津

次韵答山中人

萬卷千竿奉一身雲饒水濶豈為貧無端盃酒尋常醉
有幾籬花次第春魚腹好容獨醒客松毛穩卧不言人
長沮舊宅君今主肯向滔滔一問津

富川令劉君殉節詩劉名欽隣江南儀真人中順
治辛丑科進士

富川碧血射虹明劉令孤忠此著聲敵笑南朝惟若水
帝驚河北有真卿往來食肉心多死忼愾銜鬚氣獨生
兩聖崇儒三十載可無一士重科名

附魏象樞作

千秋完節日星明舌在猶聞罵賊聲漢水秋高勞將
士富川血碧動公卿魂依北斗升還降廟食南蠻死
即生

聖主方憐臣義重定教青史大書名

附張貞生作

讀書心事蓋棺明可慨風聞只附聲志遂休言歸井
里節高何必位公卿城池雪憤趨誰死草木啣悲哭
爾生人豈不知君父義漫云激烈是沽名

感秋呈環溪先生

秋風秋雨鎮相牽更被哀蛩喚不眠與世無求寧忍爾
關身何計轉淒然眼悲東海栽桑地心憶南山種豆田
聽說乘桴再三喜取裁應媿昔人賢

與先生言及
去官故云

敬哉先生招飲容園即事

先生幽興寄東山早沐

君恩許賜閒杖履追陪塵壚外壺觴狼藉畫圖間童携
麈尾花邊至客賭棋枰墅畔還底是當歡開嘆息應知
憂國意相關

目暗

眯目由來世所同豈期今日到衰翁濛濛只覺霧長在
爛爛俄驚電忽空敢向人前爭黑白不留燈下校魚蟲

連朝強起摩挲看為說堯天日再中

題水月菴壁時傷蕢山先生之逝

九達三市暗塵開此地如何絕點埃
松樹欲枯龍忽蛻竹花無實鳳空來
已知西日顏難駐長恨東流逝不迴
苦憶臨岐珍重語以要寧肯負泉臺

玉如下第見過作

北去南來似踐更看君幾度上書行
無波枉擊三千里不售緣無十五城
將母可能忘薄祿榮身未必是浮名

春陰愁思俱難遣
濁酒荒齋細細傾

淨業寺荷花

玉立亭亭照水孤
繁紅縹綠勝渠無
清光雅稱閒僧供
靜氣如披高士圖
楚服裁驚衫製異
吳簫飲愛茗香殊
巡池為共纓堪濯
不遣飛塵到髩鬚

別敬芝侍御

千秋矢志共觀摩
惜別其如遠道何
十日留君猶恨少
一人知我亦為多
寒灰自分難然火
古井懸知不起波

正是朔風淒緊節要從霜雪辨喬柯

拜少宰孫先生墓

拜公牀下幾何時執手丁寧後死期忽見荒丘今永閉
忍將宿草更重披眼昏難認題碑字腸斷還尋挂劍枝
一代可憐文獻盡傷心不獨感深知

郊外偶作

郊外東風颺酒旗北來南去劇如絲百年渾似下坡轂
萬事只同覆局棋漫喜春深催草茁終嫌寒緊勒花遲

從來不信楊朱淚那有無窮灑路岐

道旁老松

古松不解何時植但怪龍鱗老益多巢頂鶴翎黃似鞠
傳枝螳翼白于珂摩挲忽作三年別翫賞寧辭百遍過
韋偃畢宏今未遇無人貌爾恨如何

村舍

板屋春風對一瓢荻簾土銼共蕭蕭無妨世上嫌迂濶
最喜塵中有寂寥鄰寺遠傳茶鼓發隔村微見酒旗搖

分明憶似江南景辜負幽人歲歲招

寒夜

數卷陳編獨夜燈紙窓撲凍笑癡蠅興衰過眼悲何益
非是關心剖未能仰面祇愁看屋棟安身無過摸牀稜
強將濁酒攄懷抱芒刺時時著背膺

和就斯學士新歲韵

相看又見歲華新五十無聞笑此身冷碧細傾初釀酒
軟紅重試隔年塵庠序猶喜能供爨藿白堪悲只愛辛

憶得西溪數椽在一竿春雨待歸人

夢至一高閣下仰眺可數十仞有人凭闌引手招
予旁一人曰此七十二峰閣凭闌者諸勿菴也覺

賦此詩

岐路悠悠誤此生出山泉濁在山清三千餘里客中夢
七十二峰閣上晴長愧當年結綬意敢忘他日耦耕情
憐君扃戶空岩老猶被誰何識姓名

吹竽

吹竽鼓瑟兩難工。遮莫春光望眼中。相對盈盈還脉脉。
可堪雨雨復風風。間何濶。怕逢諸葛得入城。羞蒙子公。
豈有浮名滯胸底。怪君兀坐但書空。

十四夜

撾鼓燒燈罷。此歡繩牀布被夢。差安醺中濁酒醉亦足。
墻角短檠照自寬。少日曾誇人。了了老來真負面團團。
相憐尚有今宵月。萬里清光屬倚闌。

阮亭入都即別去。用其途中見懷韻送之。

相逢真草草相別更匆匆歲月風塵裏行藏涕淚中勿
言一尊滿又待隔年同惟有關門吏憐君西復東

附王士禎作

長安幾度別忽作白頭翁君輩還簪筆吾生自轉蓬
王師懸楚塞羣盜橫關中努力匡時略歸心滄海東
酬錫山馬雲翎秀才即文肅公孫也以乃祖集見
示故次章及之

年少才無敵詩情句莫酬衆人皆折角吾老亦低頭咄

咄驚難定期期語不休
鷗鵬與尺鷃可許暫同遊
太息前賢逝遺言更覺尊家聲留國士

天語表忠門

世祖嘉文肅殉節特賜祭謚

桓後推元子袁孤得愍孫他時應珥筆

莫忘

聖朝恩

余與鄢陵梁御史曰緝別八年今春至都謂必相見聞又請告先期行矣悵然有作

傳聞驄馬客復返舊樓山
嵩落悠悠外孤雲冉冉間
苦將遊子意遠戀故人顏
相顧稀相識長吟自掩關

月下

此夕天邊月寒光逼寢幃
可憐欲誰照空自賞清輝
只益吳牛喘能驚魏鵲飛
故園南望裏老淚強沾衣

過阮亭不遇書壁

疲馬無所適出門還過君
披帷人不見獨坐又斜曛
徑草澹逾碧林蟬寂更聞
清風來入戶宛似未離羣

和阮亭秋日過叻菴讀書齋兼懷汪大

苔面無人破常思雙屐行惟君數來往相對見平生肯
作身名計何多太息情却輸吳苑客叱犢正秋耕

附王士禎作

翰林官自達疲馬獨行吟日午炊烟寂閒門落葉深
平生有知己高卧洞庭陰莫謂升沉絕千秋共此心
彰義門外書所見

此走江南道問君歸幾時山遮將去路柳卧欲攀枝酒

合攢眉得書思挂角宜馬蹄行忽住最恨是臨岐

題胡侍御山莊

綠暗過牆樹紅明委地花
誰知柱史宅却勝住山家
曲徑淹

天仗居人稔翠華更聞

宸翰在麗藻發雲霞

莊

上嘗親幸其
賜以御筆

不識

不識平陽宅今看拂面花
春風是何物只許在君家

送慕廬兄歸楚

吳歛兼楚調離怨雜然陳落日蜚鳴急秋風雁影新難
將欲去意更對獨歸人一滴思鄉淚隨君驛路塵

二月二十八日題善果寺壁

平生孤往懷未忍薄涼踴愛茲片林幽凡禽足藏羽雜
英競吐萼枝上輕霞舉濯濯露葉翻猶栖昨宵雨化工
無停機吾心愜容與嗒坐靜忘言風鈴自相語

喜晤彭十戲贈

東歸吾意逐流波西笑逢君興轉多
欲把冠塵暫彈却滿頭霜雪奈他何

阮亭以人所贈山居圖示予有感題三絕句

千樹編欄一曲渠兩門茆屋半牀書
江南何地不如此只少閒人肯卜居

昨夢經過舊堽東青蓑倒著卧牛宮
鄰鷄無賴驚眠起羸馬依然九陌中

相攜拄笏立多時但解朝衣也未遲
好似漁洋山下路

使君那忘舊題詩

漁洋太湖諸山之勝阮亭嘗過其地愛之自稱漁洋山人

寄弟

驚春如駛惜流年赴壑修鱗去不還
燕拓纔經一番綠
吳蚕又見幾迴眠
厨空尚有東方米
囊澁長無趙壹錢
媿爾加餐勤致語
杞人終日只憂天

祠旁鴉

散似灰飛聚作團
荒祠攫食暮烟寒
金九年少從旁過
盡說神鴉不敢彈

水關馬上口占

荷葉如錢綠漸抽
鳬鷖拍拍散中流
可憐騎馬黃塵客
羞向青波照白顏

為汪舍人題畫

高樓烟暝欲微昏
黃葉聲中自掩門
疑有幽人據梧坐
嗒然終日竟忘言

往年謫官上林今秋又過其地戲題

昔年謫官此逡巡
衢術依稀記尚真
父老定然能憶我

來時謝灶請比鄰

陵遷谷變只須臾
笑我能成一事無
贏得兒童齊拍手
使君新換白髭鬚

偶成

每恨前賢不見我
却愁開卷媿先增
無端檢得熙寧史
似有人曾諫澣燈

讀書齋偶存稿卷二

欽定四庫全書

集部

讀書齋偶存稿卷三

詳校官庶吉士臣汪彥博

助教臣常循覆勘

總校官進士臣朱鈴

校對官中書臣潘曾起

謄錄監生臣汪兆鯤

欽定四庫全書

讀書齋偶存稿卷三

禮部尚書銜葉方藹撰

飲亮工侍講庭菊下四首并請蕢山學士同作

嗟君庭前菊才踰二尺彊擢秀無人處不言彌芬芳細
枝青玉潤繁盛黃金香幾時飽雨露早見吟風霜他家
豈無花華屋高筵張繁若疊綺繡艷欲奪姬姜我思匪
伊存相遇等道傍胡此獨延佇百迴嗅難忘

草木有臭味托根君子堂有草名維薏厥狀頗類菊青
莖間翠葉經冬鮮如沐菊性甘且酥食之薦嘉福薏苦
如艾蒿中更含辛毒如何逞顏色歟忽奪吾目為辦須
及早芟除貴神速種菊勿種薏期君共相勗

屈子餐落英至今清沁齒騷客借品評千載稱芳美胡
廣飲菊泉百齡負訊毀惜哉神仙藥遺穢等馬矢彼菊
奚與焉醜好像人耳今日植君廬他年視君履因遂有
靈均榮壽有伯始請君擇於斯勿自貽菊耻

堂下數竿竹堂上千卷書所喜菊有鄰維德翳不孤况
復三徑開招尋來吾徒無勞白衣送主能貫百壺葛巾
漉花前觴行如轆轤浩歌靈府寬頓覺逼人除一醉便
歌枕安知非吾廬笑彼芳蘭花日憂當門鋤

附張貞生和作

病起惋菰蘅颺彌矯彊叢桂迸金粟繽紛早減芳
橘柚圃中叟朔北鮮餘香彼美庭前菊曷當示矜張
雜色均承露正色更凌霜天然如處子驕寵薄齊姜

幽人顧比德移之就坐旁譬吾性情交綬佩矢弗忘
緬思昨夕會須記蕝子堂癖哉晉處士種秫兼種菊
種秫脩醇醪種菊厭膏沐所托在素心不與爭厚福
徘徊籬落間吟賞遠螫毒非羨方家言枕之足澤目
招集寫清風客來喜不速勿愧彼孤芳滿飲交相勗
蓮以君子埒菊以隱逸齒韓公題晚節鍾子稱五美
奈何蟲蠹之苗葉遭齧毀剪氏急殲除未嘗費一矢
聲罪蟲何知物與人同耳虎而翼者紛賢哉謹搢履

蟲賊乘間侵壞心自此始菊死猶可懷心死實可恥
餐英不能飽剪葉不能書或曰菊性傲霜節介以孤
惟傲實凶德捐潔豈其徒睨視諸躰逐高士許挈壺
四序元代行循環若轆轤焉得獨寄傲習氣盍蠲除
陶淑中且和萬物共蘧廬胡用太倔彊為汝帶經鋤
成給事貽詩却贈四百字

窮巷不設羅羣雀晝喧闐忽聽剝啄聲從吾兩版傳云
是成黃門遣使貽詩篇展誦未盡紙喟然發長歎長安

仕宦路車馬若雲煙夫子秉亮節趨舍異時賢大冠張
如箕惟君不慕官積金高至斗惟君不愛錢奚為抱感
感音促多煩煎誠知體國意憂憤寄所宣方今寓縣急
不啻身倒懸滇閩首糜爛荆蜀繼劉虔巨憝愈桀驁羣
寇彌糾纏

王師出經歲未見奏凱旋軍行賴宿飽士馬始騰騫一
日費萬金何可令久延計臣持籌坐仰屋目徒穿近聞
賊稍逼氛焰滿秦川山河百二地烽燧相接連處處繁

螟蟥戶戶化螳螂此輩皆赤子

皇恩沐多年如何甘附賊盜弄吾戈鋌中間詎無故所
宜察其端得非長民者撫馭或乖焉朽索絆六馬反更
嚴箠鞭從來制勝策貴在防未然曲突徙其薪功居焦
爛先誰得將此語一奏

重瞳前

朝廷置臺諫耳目責所專庸庸厚福子出口懼尤愆獨
君著謙直受知

聖主偏此誠國大計呼吸安危關伏蒲早論列片言可
回天何用徒悵鬱枉費餐與眠三代士執雉耿介性不
遷伏節死官下寧計身安全予本竊祿人進退屢述遭
尚啣孤嫠恤未肯軫飢寒君詩觸吾緒一為寫纏綿還
期鑒愚慙庶勿負拳拳

阮亭入都久不相見悲喜交集即事四首

與君三載別人事靡不有百憂搥枯腸有似杵舂白飄
蕭領上髮早衰媿蒲柳君顏方郁然于思只如舊新亭

風景殊舉目淚沾袖神州忽陸沈誰欲任其咎猶聞窟
室中鳴鐘正飲酒軒車爭道馳但誇熱炙手焚棟且不
知奚暇慮焚牖稍稍吐憂恤徃徃得訕詬吾願糊其心
不復辨可否共君默無言相對惟指口

溫溫考功君粹美瑚璉器對之心自遠淡然釋勢利如
何弗慙遺歟爾便委蛻新城一杯土宿草已如簞斯人
招不起竭來對難弟把酒話疇昔俛仰疑夢寐向我數
然號眼枯反無淚浮雲慘不行陽精忽淪墜始知匹夫

誠可以動天地彊思慰一辭肝腸亦先碎感此在原情
為君廢棠棣

少小弄弱翰所業在縹緲左攷右復漁什勞鮮一償晚
來始自悔暗室苦倏倏宵夢一鴻生峩冠切雲長衣間
破寶璐隱耀明月光笑吾枉辛勤白首同面牆敗絮馳
荆棘何時得康莊覺起視庭際星河未渠央恍如飲沆
瀣心腑生清涼誓將畢餘生往求聖津梁盤旋周孔地
游戲羲文場安能守雕蟲俎豆班與揚曝溫芹味美獻

君幸勿忘

古人重進德尤貴得師資麗澤繫大易伐木廢風詩求
友於今世岌岌其難之宗國無君子子賤焉取斯翼翼
魏先生言行稱人師齊心對屋漏儼與九賓期吾愧私
淑久悔吝猶日滋君為某曹郎昏旦得相隨江漢黃鵠
卵抱之須魯鷄大圭費雕琢良工堪礱治莫前美莫彰
莫後傳莫知兩賢如繼起千載此一時

大雨屋壞說蠟學士貽詩相慰為賦六章奉答

鵲巢緣風遷蟻穴因雨移智不如二物坐見此屋隳昨夜棟忽折殷殷南山雷誰為王夷甫而受排墻灾

匡坐三歲餘容膝良已足雨工何不仁歟忽壞吾屋譬如新宮灾對之三日哭禍匪降自天握粟思出卜

病卧移旁舍下濕上復穿室中縛葦筏人渡學蠃緣饑鳥噪檐際跼跼疑飛鳶何如馬伏波曳脚望青天

雨來風浩浩卷瓦秋蓬根妻孥叫且噪沸羹聲紛紜吾耳如懸瑱裒然如不聞仰首視屋漏不愧復何云

吾憐鐵衣子六月戍萬里鵲鳴兼婦歎歸室未可餒自
慙縻薄祿端居誦經史琴書無恙在一笑斯可矣

東鄰陳學士大厦今一木貽予破屋篇閔吾情何渥願
言得斯人早秉國之軸寒士生歡顏長庇萬間屋

破屋行陳廷敬原作

破屋不任葺四壁空嵯峨夜半風雨至屋漏成洪河
漂搖增繁憂夏秋連滂沱崩騰奪視聽耳目被傾邪
詎誰錯昏晝實恐陰陽訛重茅卷輕湍餘花委迴波

空梁燕雀飛蝙蝠伺其窠禽鳥饑為身所見理則那
黃鵠翅翎濕亦如嬰虞羅悲鳴如有訴翻懼彈射加
偏側南巷士移居近西家書籍正捆載瓶壘亦紛拏
君如遷喬鶯吾如盤室蝸破屋雨不止壓覆將如何
感君有同患寓意於詩歌

酬玉汝孝廉

采金鑄范蠡買絲繡趙勝多君款款心懷抱靡不罄吾
哀百無能窮老一身併徒持匹夫志謬托達人命苦節

或難貞長貧諒非病衆棄獨君取情親舍貌敬使吾賈
餘勇年徂氣彌勁時俗妬蛾眉謠詠今方盛婉孌季女
饑獨宿空閨靜安能重跣屣再與倚門競

送徐生

徐生茗川秀文穎世無匹少年愛奇字頗能讀雌霓往
者官辟雍校士實所職衆中覩徐生奚啻獲尺璧今春
辭親闈跨馬返鄉國吾家太湖西距亦不咫尺甚思樵
釣美亦欲投冠憤他時知過訪良舟得良覲荒齋何

所有草木有葑勃乞生為十詠聊以書吾壁

花下

吾庭不半弓雜植竹木繁娟娟丁香花託吾西南垣陽
春三二月桃李曜朝暾此花如靜女婉孌獨不言豈無
心中恨待與何人論兩年吾對汝惻惻暗傷魂默坐細
推測恍悟倚伏根寂寞少懽愉榮盛非久存天機自啟
閉人理孰畔援呼童即布席花下開清尊

與友人飲酒五首

茲酒清且美何如願建康
汪汪照尊卣湛然几席光
吾素不名飲而頗知平章
惡酒如暴客覩人勢莫當
涓滴乍沾吻芒角突撐腸
甜酒如佞人柔媚非善良
多食苦煩悶關鬲暗受傷
拒之恐不速那敢洗醖嘗
願獨愛茲酒一舉盡累觴
意切比中行豈若狷與狂
冲和得至味令吾形神臧
古稱君子交唯淡乃久長

京洛多貴人張筵日蕪夕
名酒產四方不脛走都邑
寧愁道里遠往來輒置駟
人肩或顛仆馬背時汎溢
每計

金定四庫全書
卷三
一罌到何啻十金直絨題復再拜輦載輸豪室貴人酒
苦多對之宛不識譬若漢廷上用人常薪積棄擲壁落
間累累等塼埴吾如揚子雲一鴟求未得茲酒偶然至
相夸動顏色甕面未及啟酒器已屢拭折簡名吾友引
杯同岸幘清聖濁亦賢從容考其德物遇良有時奚用
多惻惻笑彼井泉冽終古歎不食

唐堯罄千鍾尼父盡百觚季路苦嗑嗑十榼不能無兩
聖暨一賢相望千載孤看君比長鯨一吸無江湖入室

或未優升堂諒有餘吾飲不五合歌倒須人扶醉中發
高詠猶自述黃虞鄙哉斗筭器斯豈聖人徒

吾愛劉伯倫飲酒得真味五斗差解醒浩歌過朝市君
看如此人底物視富貴一鍾動隨身即是寔寔具形軀
尚作遠外嗜那足累不見衛與霍戚里薰天勢起家象
初連今亦成平地欲澆一杯酒枯骨無生氣

昨日公卿側逐隊前上壽低頭不出氣有若三日婦酒
行盡膝席四坐停觴久仰面吐一言愕眙下堂走今朝

遇故人雨中剪春韭發醅新甕香饒涎免流口促坐共
盟噱渾似脫械杻不知烏雌雄那問獸牝牡指吾頭上
冠譬彼堦前帚董龍今安在此時何雞狗君毋多酌
恐吾猶狂否吾狂醒較多醉來復何有

予久慕淞東黃太冲先生恨未之見四明董孝廉
過訪詢知為太冲門人於其南行作此送之并寄
黃先生

會稽有大儒世系出忠門黃童名無雙白首晦丘園六

經探奧窔百氏窮淵源躬蹈某與軻不肯託空言青衿
數十徒講誦徹朝昏曾經其指授規矩秩秩存吾聆聲
譽久仰止情彌敦一官苦束縛負笈失討論董生家東
海獻賦來

帝閭視吾頌一篇浩浩三峽奔所言雖甚夥仁義實本
根進止更可觀語笑藹春溫都雅周容刀貴重魯璵璠
驚問所師誰答云是黃君聞之增慨慕寸心暗自捫譬
如觀河者溯源必崑崙便欲裁尺書因風附南雲縣邈

汴大始淖溟究無垠陰陽所管攝方冊所羅陳聖狂何
懸間王伯何剖分一一質茫昧了了破糾紛書成再三
讀羞澁還手焚寸莛撞黃鐘如何不逡巡徒詢容貌異
那得警欬真在昔文中子道學偏河汾韜迹隱弗仕著
述儼丘墳高弟魏房流佐唐為名臣吾學苟措施奚必
在其身先生富門徒半作王國賓斯道已有傳奚用嗟
沉淪

興朝急求賢側席心殷殷安知柴荆外旦夕無玄纁北

面修盛典憲乞禮數勤予亦得挾冊函丈時相親勿著
羊裘去蒼茫烟水濱

附錄黃宗羲作

三百五十字投來自修門意欲規感興嚴不數文園
誰開塲屋眼而滌漁洛源讀之再三歎洗濯出佳言
吾聞玉峰麓莊渠割曉昏此心為主宰屹如砥柱存
辦香展餘千千軍歸玉敦千城意自遠碎鉢何足論
一傳為震川月脇開九閤文章以載道不與江湖奔

太史金閨秀學不離天根源深流自長仁體春風溫
何意疊洗中有此瑟若璫念予處幽箐何得御李君
風期托想像求日而燭捫吾徒辱贈言朗月照崑崙
茫然數難端口吃類子雲隱公已未來治亂留其根
何條可說施忼慨未敢陳為學五十載救粟真不分
崇王及賤霸衆說徒紛紜當身試證之不能救巢焚
始信本領濶寰宇方週巡不然朱墨行為儒恐未真
所以介子推抱桂枯於汾憫予幼失學患難屢破墳

幽情發思古面目誠主臣姑置四海大未能康一身
密爾文自娛無以答戲賓牧承海上老所嗟非隱淪
斯民方憔悴何以返夏殷聖學將墜地何以辨朱鯁
其職在公等學優而仕勤危舉天下溺豈徒門人親
勿令吾鄉校竊議東海濱

飲王九青侍講齋次日有詩見示奉答

愛君官閣幽庭下羅蒿蓬宛然仲蔚居開戶延清風吾
非二仲侶閒暇相過從君其具壺觴談笑許從容北牖

出西山巖壑窺玲瓏歸雲扶飛鳥恍忽躡奇踪東林復
吐月徘徊入簾櫳流光若積雪蕩吾塵腑空念此良會
暫恰與佳景逢已忘今夕軀猶寄九陌中君詩振高唱
大聲何淪淪予亦發微吟嚶嚶草根蟲但資風義合寧
計詞格工敢云牛鐸音調共黃鐘同

附錄王豫嘉作

青山雨初歇新涼上庭砌剪蔬羅盤食祿薄無過費
况與數君子紉蘭結素契分座列高臺颼颼南風至

久迹城市間草木鮮嘉歲欣瞻天宇曠遠林吐蒼翠
胸中有丘壑何處非幽寄落日下平蕪暮鐘起樓際
槐花墮階黃丹螢流衣袂月明東鄰樹泠泠清露墜
傾觴聞晚香高談羲軒世懷彼古昔人終夜難成寐

示周生

梲革以為鞠斷木以為棋猶不可無法而況乎學為古
稱在三義所重厥惟師傳道與解惑舍此其焉資分誼
一以定服事終不移如何傾蓋間輕以名相施周生賢

詰齋卓犖負奇安握衣登吾堂再拜起何遲我驚嘿內
慙欲應拙言詞長安十二門丹轂交加馳豈無吹噓者
寒谷生春熙掉頭逝不返顧此窮且羸得非生所慕其
在於道而吾少不自重干祿思逢時常羞尺寸獲恐致
丘山隳晚節始追悔蹉跎抱深悲彊勉賈餘勇此意未
知哀多生不吾棄感激動心脾為學所大成在隨俗習
非立志苟卓然奚患建豎卑神聖為奧穴善信為堂基
切問為津梁勤學為階梯吾聞之前人敬奉等蒼龜今

何以益生請誦此語貽生如汗血駒蹀躞千里蹄歷塊
同一瞬萬古美權奇吾老困伏櫪兀硯筋骨疲卧聽鼓
鼙鳴昂首還長嘶師友雖已邈風義諒可追數學恒得
半期生為予規六籍方洋洋庶幾可樂饑

梁水部贈洮河石研歌

梁生詒吾古石硯肌理細膩格端正滑於十五好女膚
光如一片青銅鏡問知此硯產洮河摩挲百遍感激多
自從逆臣反秦地關中處處持干戈洮河遠隔秦西岷

烽燧連天行旅斷十萬貔貅河上屯只言持重休輕戰
至尊宵旰坐楓宸玉劍時聞及寢門紛紛盡是承恩者
碌碌真羞食肉人白頭老淚迸雙落書生未肯甘高閣
觸事彌存報主心撫時益切匡君略夢魂昨度洮河隈
按繩手縛逆臣廻持君此硯將何用好草三軍露布來

同阮亭戶部湘北說巖兩學士登慈仁寺佛閣

衰年作客便慵情長安只如井底坐今朝傑閣相隨登
一笑醯鷄瓮新破仰睇中央閣道遼下窺兩戒山河大

三條九陌平似掌來牛去馬旋若磨憶昔耶律始都此
歷金元明彈指過高軒大車還在眼折軸脫輻非一箇
如此家居豈不好纖兒撞壞誰能卹中原遺事共誰談
淒涼翁仲草間卧吾欲跳身四海遊視棄妻子輕涕唾
大人一釣六鼇翻龍伯之宮愁揚簾迴睹蜣螂方轉丸
死抱糞壤號奇貨造化未得便休息吾曹那忍辭饑餓
歸來蒙被汗浹背素衣幸免緇塵浣

附錄王士禎作

化人閱世恒河沙老松攬地龍衙衙盤空閣道下無
地妙香似有陀羅花吾衰作客不稱意每逢望遠疑
還家三關寥落數行雁宮闕霏微千點鴉翰林三君
負公望高文大冊流滂葩惜我旅病色枯槁頭網屢
許分宮茶兵車鱗鱗指荆楚門外蕭蕭多馬撾從來
決勝在廊廟豈有羣盜煩梳爬書生手無五尺筆中
宵倚柱徒咨嗟罪言欲發但指口遙山雨脚低殘霞
此日阮亭相見輒誦雲翎詩不置戲作此貽阮亭

并示雲鉗

先生二十年稱詩齊魯諸儒皆受學邇來聲教益廣被
漸合西東并南朔海內詞人紛牛毛一一低首奉繩削
朝朱暮墨不停手點勘都是時賢作金鐘大鏞音並奏
豫章鄧林枝交錯吾但崛彊未下拜自顧門庭太蕭索
梁谿馬生好年少後來之秀才卓犖與吾談詩頗稱久
風義周旋宛如昨今年上書復報罷可憐有目俱同矐
雖然榜中失此士卻喜吾得私褚索匹夫被褐非有臯

懷璧未免中心忤常恐大力負而趨果然還被先生攬
區區一士何輕重看女絕勝得官樂竭來向客盛夸詡
獨自把卷細咀嚼先生門下富才彥生今一旦折其角
吾詩滿弱意凡近不中英俊作準格如生瓌瑋誠異寶
大圭合付玉人琢只愁藉生欲待老失去懷抱數日惡
先生詩體世爭尚人稱濟南王氏脚生也當仁幸毋讓
他年衣鉢洵可托有所聞時定告吾勿如顏苦孔之卓
阮亭遣人告予云考選

命下幼華得給事中敬芝亦授御史喜而賦此并呈阮
亭

王生叩門貽片紙使吾入戶屐齒折呂侯已戴惠文冠
令弟復入青瑣闥二子經年卧空丘竈突稀烟車騎絕
公卿何人肯延譽升沉由命非巧拙吾

皇垂拱闥四門八荒之遠庭階列拔十得五詎足异知
人其難

帝則哲得士端屬

興朝慶豈為朋友私相悅竊聞盛名不易副皦皦者污
嶢嶢缺只今寓縣正多事眼中戎馬太騷屑方州民瘼
難細數

廟堂衮職那無闕食粟都是馬立仗藏身卻如蟬翳葉
試思白筆綠何簪毋乃青蒲亦虛設二子奚以答

主知方因直木愁先伐王生頭白老郎署日抱文書袍
袖裂予亦偃蹇承明廬耳聾目眊牙齒豁杞狂憂天計
常過魯女恤緯心還切車輪腹內百千轉欲憑二子吐

鬱結朝拜官歸夕上書想見古人舊風節

題翰林院壁用東坡清虛堂韻

翰林門外風吹沙翰林先生早放衙怪君面目太塵土
經年不識長安花朝咽齏鹽暮吟誦蟲魚瑣細羅百家
官舍如水何所有高槐踈柳啼棲鴉猶言讀書洞千古
富貴過眼同春葩孔孟以來路榛塞立志猛欲為梳爬
龍種挾冊趨

祕殿頭綱日費

君王茶天街獨歸跨款段有時馬策翻倒搥人見先生
爭匿笑先生對人徒咨嗟晝長捫腹無一事拄笏且看
西山霞

附王士禎作

院門晨開埽積沙秋風獵獵雲衙衙井泉百丈徹骨
冷干霄老樹青無花男兒讀書幕中秘蓬瀛舊擬神
仙家何為到此轉愁寂官況蕭瑟如寒鴉紛華不異
草頭露薰醖一似霜前葩榮名中人等蟣蝨麻姑鳥

爪不可爬先生相士先器識品第別若鴻漸荼欲驅
駑駘步天駟王良挾策不忘撾前賢無數此成就小
儒後來胡歎嗟敝裘羸馬自神王軒軒暗室開朝霞

秋夜宿陳吉士穎侯止軒作

老墮世網厭偪側始覺軒冕非真榮觸藩遂退兩失據
人生所誤緣浮名紛華道義皆可慕魚與熊掌難合并
二者交戰不自決未便趣駕還柴荆子今乍通金閨籍
一官項領才云成胡然淡漠安此室笑睨外物浮雲輕

窻間布席大似掌屋角仰視明星熒空梁惟聞蝙蝠沸
破灶時睹伊威盈筵誦殷殷出金石轆轤那惜饑腸鳴
上沂羲文下周孔若立參前與倚衡迂濶毋乃真過吾
令人對爾顏發頰牀頭咫尺爭馳道蠅紛蝥逐聲薨薨
嚴霜誰不畏凜冽馬蹄東西各有營何如布衾足餘暖
栩栩四體無將迎翔風撼壁轟雷動羨子忘機夢不驚

寓舍對花歌

天公於人何厚薄春光亦到蓬戶中東風次第巧妝遍

一株高下酡顏紅桃嬌杏姹奚足比細看人面將無同
若令嫣然更一笑陽城下蔡難為工老夫謾詫心鐵石
對此不覺神怡融長安朱門相接連千金買花置房櫳
愛花還設紫絲帳宴客時出琉璃鍾可憐托根歎非所
年年長伴白頭翁惟愁雨淋與日炙空妬狂蝶兼遊蜂
不辭窈窕守寂寞毋乃真為悅已客人生相知一已足
傾城絕代寧易逢瑤姬神女畫不得豈于長短分纖濃
老大自知才久盡間情欲賦讓陶公

月下同友人作

何處無此月顧少吾兩人空庭蒸苕交光景相鮮新微
燄偶然散搖動波鄰鄰愛此久延佇清露泣衣巾談諧
時領要吟咏還入神豈營文史適實資風義親朱絲絃
枯桐三尺懷中珍非君能好古此調為誰陳

雨霽

雨霽景物好新禽媚朝旭此時掩卷坐忽憶故山曲池
動波瀾瀾林吹香簌簌王孫自不歸空怨庭草綠

送同年某丞

名士不為簿不遭無不可此語聞昔賢未嘗厭卑瑣子
才匪百里遷官偶然左母言佐邑小君命豈敢墮民人
與社稷爾實共肩荷但恐吾負丞寧憂丞負吾王程行
有期疾鼓秋風柁慎勿槌破壁車中且安坐

金陵道中即事

萬里江平一鏡開中流擊楫暫徘徊遠天山際浮青出
深樹村家送綠來無復然犀驚渚渚空倚鳴鳥下高臺

偶然憶著騰騰坐髻似霜絲念似灰

渡江行

黑雲壓波波如山銀城雪屋翻飛間老魚揚鬣洲前立
倒卷金山同一粒萬斛龍驤秋籜輕長年呼天叫倉卒
雨工驅雷鞭羣羊朱旗白蓋蚩尤光眼前彷彿多奇狀
虹霓照耀三重梁井蛙谷鮒俱得意噴濤吹沫爭人噬
灌壇老婦忽迴車湖口龍姑亦旋旆還吾萬里之山川
青天不動白日懸狂氛毒焰勢難久片帆破浪無憂煎

但願世路風波亦如此天道好還理固爾

此徑

長安惟此徑日日綠苔生地僻塵難到窓幽夢易成汲
泉防竹洗分食待禽鳴笑對花開落知君不係情

歸家

錯憶倚閭待歸程恐較遲忽驚幽顯異方悟死生期有
淚都成血無鬢不變絲寒塘行過處黃草應時衰

虎丘晚步

虎丘山下路獨往與誰期
明月不改色好風無盡時
涼深蟬響音寂吟細履行遲
一葉林端墜惟應倦客知

送雪州還楚

京華同踏十年塵君去扁舟正暮春
惜別有情傷晚晚邀歡無地許逡巡
湘江水是愁中淚巫峽雲為夢裏人
明夜開時還北望倚舷定對月相親

芙蓉花

雨欺風壓苦禁持
墮白飄紅滿曲池
敢向人前怨摧折

自憐遲暮失春時

口占

秋心切切復淒淒
月落空江影忽低
自是愁多眠不得
錯教人恨夜烏啼

冬夜渡江

擊楫中流萬古情
客心牢落暗多驚
天隨逝水茫茫去
月共孤峰的的明
潮勢欲吞郭璞冢
角聲猶遶呂蒙營
舟人指點前年事
却怪幾成監子名

梁將軍戰場歌

卷三

天吳倒蹙東海水毒霧罩空白日死妖蛟百丈腥風黃
鬼馬踏雲平地起龍江渡口天狗落燕子磯頭波聲惡
甕城一片豎降旗健兒十萬崩厥角將軍此時吳淞來
提戈一怒燭龍迴指麾五丁發神弩百怪辟易陰霾開
倏如秋鷹縱搏擊雨血風毛灑原隰又如春蠶食葉聲
千筐頃刻無留停昨朝餘皇倚北岸兕甲蠻刀耀飛電
今朝髑髏鍾山平萬點哀憐蔽江面捷書飛入玉河橋

天子開殿冊勛勞，鴉翎寶鈔麒麟袍。
勅賜甲第功臣高，嗚呼將軍真人豪。
君不見黃鬚鮮卑輕朝士，側目獨憚高敖曹。

旅次家弟拏舟相迓喜而有作

執手猶疑入夢無，屋梁顏色焰模糊。
一官失路饑寒並，萬里新逢涕笑俱。
梁上尋巢看舊燕，堂前反哺媿慈烏。
從今喜遂連牀約，休恨西窓夜雨孤。

河間旅壁見西樵阮亭前後題詩因憶故園兄弟

感而有作

兄弟烏衣擅盛名十年游宦各關情因君重作江南夢
一夜池塘草盡生

又題二王詩後

滿把驪龍頷下珠摘來都與世間殊何緣暗裏輕拋擲
可有旁人按劍無

太白百篇徒浪語陳王八斗亦虛名儘人誇說多才思
爭似王家好弟兄

王元之謫居廣陵賦僧舍芍藥有感傷綸閣多情
客之語予屏居田里偶過鄰僧院中適見此花感
而有作并寄鵞湖立齋姑思

顧影嬋媛不自持芳菲空睹上堦遲淒涼曉日辜新寵
憔悴春風泣舊枝綸閣夢迷起草地錦袍腸斷賞花時
敢思五味為君和惆悵茅檐泪暗垂

萬年枝上轉春暉憶爾同時下直歸白髮飄零餘我在
青雲儔侶似君稀雕闌望斷人何處金屋思深夢已非

怪底天香消不盡可憐還染衲僧衣

少年行

翠袖雙彈碧玉箏
舫船一吸捲長鯨
纔成微笑千金散
買得人間俠少名

春晝

濕雲漠漠覆沙汀
春雨春風晝冥冥
花似斂愁初欲睡
山如中酒未全醒
人間那有屠龍技
世上虛傳相鶴經
簾外光陰不相待
空教鶯語費丁寧

秋夜與駿孫話近事三首

十年回首憶同遊，牢落西風卧一丘。
吾作官人疑劍外，君真廷尉望山頭。
髮如綠草經秋短，身似黃楊遇閏愁。
去歲予與駿孫罷官俱在閏七月苦欲乘查問消息，夜涼河漢正悠悠。

雲霄數子共騰騫，上殿常邀

聖主恩。醉酒時污丞相席，揮鞭不踏五侯門。
風前泪

落山陽笛

時嘉賓新亡兼傷辰生之逝

月下愁傾北海尊，今日昏

昏吾與汝齊名江左媿時論

已亥榜發後賈人以予文同駿孫作合刻號江左二

名家

翟公賓客散如煙絮酒生芻幾個探

少師安邱公

東閣久應

成馬廐西州空自笑羊曇

鷺湖書來始知公計

閣棺終荷

君恩厚正笏誰將國是擔三載扶風門下士猶餘窮泪

灑天南

吳門喜遇濟南王龍師年丈兼懷令姪阮亭使

君

三載京華別相逢但舌存黃塵辭上國白眼看中原俗
薄輕文士時清厭酒尊留君共寂寞新月到柴門

最憐君小阮江國久停麾才大真詩伯風流實吏師瓊
花神女館碧柳隋_叶皇陂何日重攜酒論文慰夙期

再同龍師飲山房

勝地堪乘興臨高數舉觴天清秋在水樹冷月浮霜咄
咄殷生病栖栖魯叟狂此心兩不有何事爾難忘

呈呼先生

先生志節古人風五十猶然孺慕同久廢修琴入市少
時來賣藥見壺空思探玉女凌秦嶽欲訪金人到漢宮
先生將于來歲西游
華嶽便道即過京師策杖擔簦風願在何時陪侍上崆

峒

贈鍊師

笑戴黃冠下玉京飄然塵壒得閒情身從雲外尋丹藥
客向峰頭禮磬聲指屈滄桑真短景功資鷄犬亦長生
何時謝却浮名累與汝同游十二城

送人

盧郎年少正風流
少婦閨中有莫愁
不學楊雄陪執戟
却同范蠡去乘舟
吹簫自愛君山曲
解珮真憐漢水頭
行到高唐休作賦
恐教神女更添羞

野泊

蕭條殘日噪寒鴉
野岸維舟靜不譁
高寺風多聞夜磬
遠村木落見人家
犬聲似豹來窮巷
螢火如星度淺沙
入望明河應更迥
祇憐無計問歸槎

扁舟

扁舟起曉潮獨坐聽鳴橈野鶴渾相識沙鷗時欲招楓
明霞岸岸蘋吐雪朝朝蓑笠真堪老何人愛寂寥

懷駿孫雲間

海國風高雁影疎美人渺渺正愁予空吟王粲登樓賦
誰獻鄒陽入獄書夢去青雲傷舊侶悲來白髮滿新梳
茫茫歧路終難問休怨明時獨掩廬

白鷺

吳波越浪兩茫茫，却占荒原立夕陽。
海鶴肯教成伴侶，野鷗應自笑行藏。
風塵不染衣間素，春色難銷頂上霜。
剩有江湖餘念否，汀花岸芷夢魂長。

北發令蓉有詩見贈次韻奉答

終年學泛五湖船，吳越相看作水仙。
自問功名三黜老，休言詞賦萬人傳。
青雲多媿車中客，白首甘師柱下賢。

念爾雄文誰薦達，臨歧太息蓼莪篇。

令蓉新
遭內艱

北上過揚州寄別阮亭司理

金史四庫全書
卷三
三秋索莫感違羣乍喜相逢便惜分仙吏情深東道主
故人心負北山文馬嘶別恨隨春草雁帶離聲入暮雲
無限邛溝千萬柳長條折盡為夫君

送阮亭省覲東歸

黃葉投空似散絲相留無計轉淒其知君正急庭闈慕
媿我徒深離別悲欲去倍應憐往日未行先已數來期
生憎赤棒諸門卒穩放車輪出路歧

附王士禎作

憂患餘生見面遲故人驚喜髮成絲
茶杯冷淡香殘處塵尾橫斜月落時
沙磧斷鴻千點沒都亭衰柳數行垂
沾衿又作消魂別不為中年好酒悲

題雲翎詩卷三絕

不分方丈與蓬萊
突聳中天萬玉臺
怪道九龍同培塿
六鼇新駕一山來

暫駐鸞輪玩物華
假斟瓊液灌靈芽
千年結子猶嫌少
休愛人間頃刻花

東海悠悠浪拍天
丹砂拋盡未成田
他時莫被方平笑
狡獪麻姑一少年

秋夜不寐三首

孤館夜不寐
寒衾轉蕭爽
驚飈振庭柯
落葉無隱響
離憂靜中起
羈懷益難廣
默起撫朱絃
殘燈耿虛幌
應龍果何物
飛騰在斯須
氣噓烟霧蒸
降雨沛九衢
喉下差差鱗
批之常殺軀
卽因微欲牽
豢畜同凡魚

我愛庭前柏
經霜常綠林
上有千歲禽
唳月揚清音
直

節無旁柯顏色忘冬春人云桃李花不言蹊自深青青
歲寒姿樹此豈無陰

見入京鄉人

君家西溪上我家東溪頭君家門前水我家門前流憶
得初別君扁舟趁潮發豈無澄清志自擊中流楫竭來
騎瘦馬復踏京華春半年縻薄祿辜負頭上巾怪君亦
奚為跋涉三千里乍見故鄉人還思故鄉水水中何所
有蹙蹙多勞魚昔時魚尾赤問訊今何如

苔

縈砌復緣廳淒涼不斷青雖非侵要路亦自占閒庭顏
子操瓢巷揚家載酒亭尚堪留汝在終歲共沈冥

詠漢史三首

援臂將軍恨未封老居列校衆人中秋來射虎雄心在
自挽藍田十石弓

朝夕常贏粟一囊先生索米底須忙可知殿上容君住
猶勝前人遠弔湘

聖主賢臣久寂寥子淵一頌徹中朝如何麗藻誇難並
只替君王賦洞簫

又詠漢史三首

一篇書奏卓然驚漢殿人人說陸生知道多時交絳灌
帝前日日為通名

犬馬餘年戀主私汲公遺語使人悲如何不悟淮陽譴
忘却狂言妄發時

賈樂才華蓋帝京鴻都詞賦叛新刑天如留得中郎在


好為君王校五經

寄詢健菴編修三首

昔與故人別秋風滿帝京今朝相憶處春草遶堦榮
息影江湖興憂時魏闕情勸君休捉鼻蚤起念蒼生

聞道名園勝新開淶水濱輕軒緣奉母重閣為延賓
泉石推遷數生徒講肄頻閒居亦有政未肯偃經綸

契濶已三載對君仍故吾憂生常鹿鹿感物但烏烏
官拙同門限身卑學戶樞可應車馬地反久著潛夫



讀書齋偶存稿卷三